



PENGERUSI JAWATANKUASA
KIRA-KIRA WANG NEGARA (PAC)
MERANGKAP AHLI PARLIMEN MASJID TANAH
PEJABAT SEKRETARIAT
JAWATANKUASA KIRA-KIRA WANG NEGARA

Tel : 03-2601 7263 / 2698 6852 (DL)
Faks : 03-2698 9218
Email : pacparlimen@parlimen.gov.my
Laman Web : <http://www.parlimen.gov.my/pac>

6 Mac 2025

KENYATAAN MEDIA PAC

1. Jawatankuasa Kira-Kira Wang Negara (PAC) hari ini membentangkan **Penyata Jawatankuasa Kira-Kira Wang Negara (PAC) Parlimen Berhubung Perolehan *Foreign Workers Centralized Management System* (FWCMS) Di Bawah Kementerian Dalam Negeri** di Dewan Rakyat.
2. Isu berhubung Perolehan *Foreign Workers Centralized Management System* (FWCMS) ini mendapat perhatian PAC selepas Jawatankuasa ini dimaklumkan bahawa Kerajaan telah menandatangani perjanjian dengan Syarikat Bestinet, penyedia FWCMS pada kadar RM215 semasa pembentangan Tindakan Susulan Pegawai Pengawal Terhadap Syor-Syor Laporan PAC Parlimen berhubung Pengurusan Pekerja Asing melalui sistem ePPAx dan FWCMS pada 6 November 2024.
3. Susulan daripada pembentangan penyata tindakan susulan berkenaan, timbul persoalan berhubung kewajaran Kerajaan untuk menandatangani perjanjian berkenaan selepas enam tahun Surat Setuju Terima (SST) dikeluarkan iaitu pada 2018.
4. Selain itu, kadar caj bayaran yang dipersetujui iaitu sebanyak RM215 juga dilihat tinggi berbanding dengan apa yang dilaporkan kepada PAC sebelum ini iaitu sebanyak RM100.

5. Berikutan itu, dengan menggunakan punca kuasa di bawah Peraturan Mesyuarat 77 (1) (d) iaitu isu yang bukan di bawah Laporan Ketua Audit Negara sebaliknya **“Apa-apa perkara lain yang difikirkan oleh Jawatankuasa itu patut diperiksa, atau apa-apa perkara yang diserahkan oleh Majlis kepada Jawatankuasa itu”**, PAC telah memanggil semua saksi yang berkaitan untuk memberi keterangan mengenai peranan dan penglibatan mereka dalam isu yang dibincangkan dalam tiga (3) prosiding iaitu pada 10 Disember 2024, 21 Januari 2025 dan 3 Februari 2025.

6. Saksi-saksi yang dipanggil adalah seperti berikut:

- i. Tan Sri Shamsul Azri bin Abu Bakar, Ketua Setiausaha Negara (KSN) merangkap Pengerusi Jawatankuasa Induk FWCMS;
- ii. Dato' Mohd Dusuki bin Mokhtar, Peguam Negara (AG), Jabatan Peguam Negara;
- iii. Datuk Johan Mahmood Merican. Ketua Setiausaha Perbendaharaan, Kementerian Kewangan (MOF);
- iv. Datuk Awang Alik bin Jeman, Ketua Setiausaha (KSU) KDN;
- v. Datuk Azman bin Mohd Yusof, KSU Kementerian Sumber Manusia (KESUMA);
- vi. Ts. Dr. Fazidah binti Abu Bakar, Ketua Pengarah (KP) Jabatan Digital Negara;
- vii. Dato' Zakaria bin Shaaban, KP Jabatan Imigresen Malaysia (JIM);
- viii. Encik Roslie bin Rustam, Unit Kerjasama Awam Swasta (UKAS), Jabatan Perdana Menteri (JPM);
- ix. Tan Sri Alwi bin Haji Ibrahim, mantan KSU KDN (2015 – 2019); dan
- x. Encik Alan bin Abdul Rahim, Mantan Setiausaha Bahagian, Bahagian Hal Ehwal Imigresen (September 2017 sehingga Jun 2018).

7. Hasil daripada prosiding yang diadakan, penemuan PAC adalah seperti berikut:

- i. Surat Setuju Terima (SST) bertarikh 12 Januari 2018.
 - SST bertarikh 12 Januari 2018 telah ditandatangani oleh Setiausaha Bahagian (SUB) Bahagian Hal Ehwal, Imigresen bukan oleh KSU KDN.
- ii. Faktor Kegagalan Memuktamadkan Kontrak FWCMS Dalam Tempoh 1 April 2018 Sehingga 31 Mei 2024.
 - Tiada kesepakatan dalam menentukan caj fi yang sepatutnya dikutip oleh syarikat.
- iii. Penetapan Caj Bayaran Bernilai RM215.
 - Perjanjian FWCMS telah ditandatangani pada 3 September 2024 dengan caj kutipan yang telah dipersetujui iaitu RM215.
 - caj kutipan RM215 adalah berdasarkan kepada RM130 untuk pemulihan dan RM85 untuk perjalanan operasi Bestinet selama enam (6) tahun termasuklah kos ekuiti dan kos-kos operasi.
- iv. Pembayaran Caj Kutipan RM215.
 - Caj kutipan RM215 akan dikenakan kepada majikan
 - Dikutip oleh pihak kerajaan melalui JIM
 - Di akaun ke dalam Akaun Hasil Disatukan sebagai liabiliti
 - Bayaran balik akan dibuat kepada syarikat
- v. Penetapan Kadar RM86 Oleh UKAS.
 - Dikira berdasarkan kadar pulangan dalaman ekuiti *atau equity internal rate of return* (EIRR).
- vi. Tempoh Kontrak Dan Pemilikan Sistem FWCMS.
 - Tempoh kontrak baharu FWCMS adalah selama enam (6) tahun iaitu 1 Jun 2024 hingga 31 Januari 2031.
 - Tiada lagi penyambungan kontrak setelah kontrak ini tamat pada 31 Januari 2031.

- Selepas tamat tempoh kontrak sistem FWCMS akan menjadi hak milik Kerajaan.

vii. Ketetapan Jumlah Pekerja Asing.

- Kerajaan telah menetapkan jumlah pekerja asing ialah 2 juta orang iaitu tidak melebihi 15 peratus daripada keperluan tenaga kerja dalam negara.

viii. Kutipan Levi Pekerja Asing Bagi Tempoh 2018 Hingga 2024.

- Jumlah kutipan levi pekerja asing bagi tempoh 2018 - 2024 adalah RM23.35 bilion.

ix. Integrasi Sistem FWCMS dengan Sistem NISe.

- FWCMS akan diintegrasikan dengan sistem NISe selepas tamat tempoh kontrak.

x. Ketersediaan Modul FWCMS.

- 1 November 2024 kesemua modul FWCMS telah pun digunakan.

xi. Pengecualian Tatacara Perolehan Bagi Kontrak FWCMS.

- kelulusan pengecualian tatacara perolehan bagi kontrak FWCMS telah pun diperoleh daripada MOF.

8. Berikutan penemuan Perolehan FWCMS, PAC telah membuat enam (6) rumusan iaitu:

- i. Terdapat kejanggalan apabila Kementerian Dalam Negeri (KDN) mengeluarkan Surat Setuju Terima sebelum memuktamadkan terma-terma dan kaedah perolehan dalam proses mengeluarkan Surat Setuju Terima FWCMS.
- ii. KDN gagal untuk memuktamadkan perjanjian berikutan pertikaian berhubung kadar caj yang patut dikenakan bermula 1 April 2018

sehingga kontrak tamat pada 31 Mei 2024 seperti yang dinyatakan dalam SST.

- iii. Kegagalan Kerajaan menghormati SST yang ditandatangani dan tidak memuktamadkan kontrak sehingga tamat tempoh telah membuka ruang kepada Kerajaan terdedah kepada tindakan undang-undang oleh syarikat Bestinet yang menuntut ganti rugi berjumlah RM1.57 bilion.
- iv. Tuntutan daripada Bestinet berjumlah RM1.57 bilion adalah berdasarkan kiraan kerugian pendapatan Bestinet dan faedah dari 1 April 2018 sehingga 31 Mei 2024 iaitu masing-masing bernilai RM1.32 bilion dan RM252 juta yang sepatutnya dikutip oleh Bestinet melalui sistem FWCMS.
- v. Oleh itu, syarikat telah mengemukakan tuntutan baharu sebanyak RM230 dan Kerajaan terpaksa berunding dan bersetuju pada kadar RM215 yang mana lebih tinggi daripada kadar yang dinyatakan dalam SST iaitu RM100 dan lanjutan tempoh kontrak selama enam (6) tahun lagi sehingga 31 Januari 2031.
- vi. Merujuk kepada perjanjian yang telah ditandatangani pada 3 September 2024, caj kutipan bernilai RM215 adalah berdasarkan kepada RM130 untuk pemulihan dari tahun 2018 sehingga 2024 dan RM85 untuk kos pengoperasian 2025 hingga 2031 termasuklah kos ekuiti dan kos-kos operasi.

9. Sebagai langkah penambahbaikan kepada isu Perolehan FWCMS, PAC Parlimen mengesyorkan empat (4) perkara kepada Kerajaan untuk dilaksanakan seperti berikut:
- i. KDN hendaklah memaklumkan mengenai mekanisme kutipan caj RM215 dan kaedah pembayaran kepada Bestinet yang telah dimuktamadkan serta diluluskan.
 - ii. KDN perlu menjelaskan kaedah terbaik dalam mengoptimumkan FWCMS sehingga tahun 2031 memandangkan pembangunan sistem NiiSe dijangka siap pada 2028.
 - iii. KDN haruslah meningkatkan kawalan keselamatan siber termasuk sistem dan data terhadap FWCMS memandangkan sistem ini diuruskan oleh syarikat Bestinet.
 - iv. Kerajaan perlu mematuhi sepenuhnya prosedur perolehan dan segala peraturan kerajaan berkaitan yang sedia ada dan sedang berkuat kuasa.
10. Orang ramai yang berminat untuk membaca dan meneliti **Penyata Jawatankuasa Kira-Kira Wang Negara (PAC) Parlimen Berhubung Perolehan *Foreign Workers Centralized Management System* (FWCMS) Di Bawah Kementerian Dalam Negeri** boleh memuat turun (download) penyata berkenaan di laman web PAC di alamat www.parlimen.gov.my/pac .

Sekian, terima kasih.

YB Datuk Wira Mas Ermieyati Binti Samsudin